

Ta nos legisladornan a yuda crea chollernan na Aruba

Ora scucha radio y tende con "chollernan" ta wordo ataca pa ta "bandido, bagamundo, showru, ladron, destructor, vandalista, drogadicto", etc. bo ta puntra bo mes, di con? Kende tin culpa, pakico a yega asina leu? y asina por sigui haci pregunta. Di otro banda ta tende tambe; corda cu nan ta hende; nan ta yiu di mama; nan ta hendenan cu un malesa y mester di tratamento, y asina tambe por sigui.

Cuarenta aña caba nos ta tende cu Shon Esaki y Shon Esaya ta e Caponan di traficacion na Aruba y te awe nan ta sperando polis y recherche na porta.

Tin si cu no tabata gusta of tabata forma peliger pa otro Shon Esaki of Shon Esaya, cu si a bay cera, pero e cantidad di otronan cu tambe ta Shon Esaya y Shon Esaki, ta tranquil di nan, pasobra ta e peonnan a bay cera te awor of ta esnan cu ta detene, depediendo tambe kende nan ta, sino ta "kita man"!

Ta ultimo 40 aña traficacion y venta di droga a cuminsa bira popular riba nos isla, a pesar cu ta for di tempo cu Lago a establece na Aruba ya droga tabata conoci. Tabata conoci di e importacion di opio di parti di chinesiannan cu a bin establece na Aruba, pero esakinan tabata pa propio uso y no tabata tin venta popular manera e caso ta awendia cu droga.

A cuminsa drenta despues e marihuana cu tabata e droga "pisa" y cu a cuminsa papia di droga. Tur hende tabata canta "La Cucaracha" sin scucha e palabranan bon cu ta bisa cu "marihuana ta pa wordo huma".

Den añanan sesenta, e cancion "Amapola" a bira hit mundial, y ningun hende a cay riba e hecho cu e "amapola" ta wordo usa pa heroína, y ta canta e "dushi cu esaki ta".

Na comienzo di decada 70 e cocaína a cuminsa bira popular y cu despues a bira e e popular "crack" y "Basuka" y despues diferente sorto di droga natural of sintetico mas a drenta.

Entre 65 y 75 a pone man riba algun di e grandinan, y hasta tiroteonan formal tabata tin na momento di actua y cu victima mortal a cay, y despues nada mas.

Te cu e periodo aki, Aruba no tabata conoce "dakloze problematische druggebruiker" cu den comunidad a wordo yama "choller".

No ta tur choller sinembargo ta usador di droga aunke ta tur ta carga e denominacion "choller".

Prome cu esey nos tabata conoce e "burachenan" di Alameda. Nan tabata esnan problematico den centro di ciudad, y e "burachenan" di Alameda a caba y e "chollernan" a drenta.

BURACHENAN A CAMBIA PA CHOLLER

Chollernan cu tur sorto di problema, pero cu masha poco atencion a ser poni pa nan, y e cantidad a sigui crece, y pasobra ta "choller" ningun hende a haci algo pa yuda.

For di den añanan 40 cu e prome caso di "marihuana" na Aruba a bira conoci, cual tabata algo sporadico, ta ALCOHOL a manda na Aruba, te cu periodo di "burachenan" di Alameda mas conoci cu e cantidad grandi di alcoholistanan di nos isla.

E cantidad di alcoholistanan tabata asina grandi cu a bini organizacion pa trata e alcoholistanan mey mey di decada 50, a bini tambe AA cu tabata hopi bon dirigi pa Dr. Oswald Wever, y despues a bini poco poco tur sorto di organizacion pa lucha contra droga, pero cu te awe ta "manera man mara".

A bini centronan, cu awe tin nomber mas negativo cu malo, pasobra mentalidad di nos hendenan tambe a cambia.

Esnan cu mester a yuda frena tur e desaroyo aki tabata y ta nos legisladornan, y ta net nan cu tabata tin tur poder den man, a haci NADA pa yuda, y mas bien a empeora e situacion door di no haci nada.

Nos legisladornan tabata wordo adverti aña tras aña pa haci algo, y te awe ta sperando pa algo POSITIVO EFECTIVO wordo haci, y tur cos ta paraliza.

UNDA NOS POLISNAN TA PARA ANTO

Nos polisnan no por haci nada. Antes nan por a para hende, listra nan y kita droga for di nan. Awe nan no mag haci esaki mas. Antes, si bo core cu bicicleta sin luz, sin bel, bicicleta ta wordo kita y boet ta cay. Awe tur hende ta core bicicleta anochi sin luz, y casi no tin bicicleta mas cu bel riba dje.

Antes ora polis para un vehiculo e por a listra esaki, y evita traficacion y tur sorto di delito of crimen. Awe nos legisladornan a haci asina bon trabao cu polis no por para auto y listra esaki mas. Si nan habri un baul mes y mira droga den dje, nan ta wordo tilda di a actua ilegal pasobra ta pa pasamento den luz cora nan a para e auto y no pa sospecho di posesion di droga.

Awe si polis detene traficadornan of hendenan cu droga den nan posesion, mester tin prueba cu e traficacion a tuma lugar y mester prueba cu e posesion di droga ta pa venta y no pa uso personal.

Laga pasa mes cu a haci detencionnan. Ta resulta cu nan ta haya ordo di laga e hendenan bay pasobra "no tin lugar den KIA".

Pero polisnan mes no por traha tranquil y cumpli cu nan trabao debidamente mas tampoco, pasobra "no tin placa". Por a ripara ultimo tempo cu ta "menos blauw" bo ta mira. Esaki pasobra NAN ta na cas cu "time back" pasobra no tin placa pa paga overtime.

NO TIN REHABILITACION TAMPOCO

Si detene traficadornan, usadornan y hasta chollernan, kico ta sali afo despues di castiga nan cu castigo di prison? Nan ta sali y sigui cu e mes bida, pasobra no tin rehabilitacion.

E instituto pa "COREGI" esnan cu ta cay cera, no por haci esaki. Si nan rehabilita mes, nan no ta haya trabao. Si nan haya trabao mes, dunador di trabao ta bin tende cu e tin un drogadicto, un usador di droga, un bendedornan di droga, un ladron, un ex choller, un criminal den servicio, y e persona aki ta wordo kita of pretexto ta ser busca pa dune su retiro. E confianza cu mester demostra e persona rehabilita no tye, y e persona rehabilita ta cuminsa perde confianza tambe den institucionnan y comunidad.

E uniconan cu ta traha pa yuda "chollernan" y drogadictonan ta e gruponan evangelico cu ta trata na cambia nan bida cu "e Palabra".

PELIGER CU CHOLLERNAN TA CORE

Ta masha dificil pa publica tur locual ta ser papia riba chollernan. Sigur ta cu bida di chollernan ta core peliger riba nos isla. Loke ta ser papia ta duna indicacion cu "chollernan" (y ladronnan) ta birando "vrije vogel" den comunidad y cu pasenshi di hopi habitante di nos isla ta cabando y cu nan lo tuma husticia den nan propio man ora di bira victima di chollernan. Loke ta ser papia tur caminda no ta nada di bunita, pero no ta cosnan pa publica.

E actitud di e chollernan ta ser desprecia y nan ta ser culpa di tur cos, pero esnan cu mester a evita tur esaki, y cu tabata tin tur cos den nan man pa actua, no a actua, y esey ta nos legisladornan.

Tin chollernan cu "profesion" limpi den nan man, y cu no por ser yuda y no ta ser usa tampoco pa e por mehora su bida.

No tin instancia cu ta usa e hendenan aki. Un DOW cu por usa nan pa haci canto di cayanan limpi, un FCCA cu por usa nan den construccion, un Sta. Rosa cu por usa nan. Un centro di rehabilitacion cu Tayer cu por pone e hendenan aki siña un ofishi y percura pa nan sigui den e ofishi despues. No, no tin. E chollernan ta marca. Nan ta na caminda di bira "vrije vogel".

Esnan cu sali di prison despues di sinta castigo pa ladronicia of otro crimen, tampoco por conta cu rehabilitacion, (si nan no tin un famia fuerte nan tras) pasobra nan tambe ta keda marca.

Despues di keda frustra y desemplea y drenta mundo di droga nan tambe ta bira choller y e cantidad ta sigui subi, locual e traficadornan ta desea tambe.

Esnan cu a lesa e rapport di Fundini mas o menos 10 aña pasa por a lesa cu e tempo ey caba tabata tin 11.000 usador di droga na Aruba. Di esakinan un cierto porcentahe ta "e dakloze problematische druggebruiker" conoci awe como choller.

Den diez aña cu cuanto e 11 mil aki no a aumenta? Cuanto placa ta ser gasta na droga awe, compara cu e 50 milyon florin calcula 10 aña pasa, pa aña?

Ki dia nos legisladornan ta cuminsa traha riba e problemanan cu diez aña pasa Fundini a califica como e "impacto social" di droga na Aruba, y tur cos a keda "status quo?"

Kico ta ser spera? Pa hendenan inocente, decente, cuminsa tuma husticia den nan man pasobra nan ta birando victima (constantemente) di e chollernan?

Señores tuma mi palabranan, cos ta pinta hopi malo Pa vota dia di eleccion si chollernan ta conta.

Juby Naar